

Date –30/08/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Kum 2025 leh kumin July thla inkar chhung khan Mizoramah lirthei vawi 179 a chesual a, mi 95-in an thihphah.
- 2. Comptroller & Auditor General of India (CAG) audit report chuan Mizorama Green India Mission (GIM) hnuai-ah cheng vaibelchhe 9 leh nuai 19 hman dan rinhlelhawm tak a awm a ti.
- 3. Mizoram Universal Health Care Scheme (MUHCS)-a inziaklut mi nuai 3, sing 2, sang 2 leh 243 an awm mek.
- 4. Prime Minister Narendra Modi-a’n ramchhung hmun hrang hrangah Nasha-mukt Yuva for Viksit Bharat beihpui, uar takin thlak chhoh zel a ni, a ti.

<><><>

ROAD MISHAP

Kum 2025 leh kumin July thla inkar chhung khan Mizoramah lirthei vawi 179 a chesual tawh a, mi 95-in an thihphah.

Home department-in an chhinchhiah danin lirthei chetsual chhan tam ber chu khalh chak lutuk vang a ni a. He mi hun chhunga lirthei chetsualna thleng za zela 59 point 5 chu lirthei khalh chak lutuk vang niin mi 54 an thihphah a, mi 36-in hliam an tawrhphah bawk. Fimkhur lo taka lirthei khalh avanga chetsualna thleng hi za zela 20 point 7 a ni a, mi 27-in an thihphah bakah, mi 19 in hliam an tuar a,Rui chunga lirthei khalh vanga chetsualna thleng hi za zela 19 point 8 a ni a, mi 14-in thihphahin mi 14 vekin hliam an tuar bawk a ni.

Lirthei chetsualna titem tur hian sorkarin kawng hrang hrangin hma a la a. Mizoram Police kaihhruaina in School, College, Kohhran, NCC, Drivers Union leh tlawmngai pawl hrang hrangte hnenah Road Safety Awareness campaign a a buatsaih thin a. Road Safety Month pual mai bakah hun remchang dangah te pawh Sorkar mi pawimawh te’n local cable TV, All India Radio leh Doordarshan ah te lirthei khalhtute tana hriat tur pawimawh puan chhuahna hun hman thin a ni a, heng bakah hian Social Media kaltlangin awareness a theih ang a tam kalpui thin a ni bawk.

<><><>

FUEL CESS

Petrol leh Diesel atanga Social Infrastructure and Services Cess Sorkar-in a lak atangin Social Welfare, Women & Child Development Department chuan Sum cheng Nuai 1165 a dawng tawh.

Kan Correspondent report ilo ngaithla ang

Assembly thutkhawm zawh taka zawhna ziaka chhanna-ah Social Welfare Women & Child Development Department Minister Pi Lalrinpuii chuan tangka kum 2025-26 chhung khan Nuai 300 an dawng thu leh tangka kum 2026-27 chhung hian Buai 865 budget ah dah a nih thu a sawi a. Kum 2025-26-a Nuai 300 dawn atangin Nuai 253.65 chu Hulhiap Short Stay Batch 9 kalpui nan Nuai 150 hman a ni a, Drug Treatment cum Rehabilitation Centre/Home hrang hrang 21 tanpuina atan nuai 28.65 hman a ni a, Apprenticeship Program for After Care of Children ah Nuai 57, Sing 1 Sang Hnih, Renovation of Children Home, Durtlang-ah Nuai 5 leh Sang 5, Integrated Women Empowerment Programme -ah Nuai 5, Home for Destitute Children-a naupang enkawlana atan -Nuai 5, Sing 8 Sang 3 leh Recreation Centre for Children -ah Nuai 2 hman a nih thu tarlan a ni.

Kum 2026-2927-a Cheng Nuai 865 dawn hi a hman dan tur ruahman mek niin, Directorate of Social Welfare hnuaiah leh Women & Child Development hnuaiah a zat ve ve-a hman atana dah a ni.

<><><>

CAG - GIM

Comptroller & Auditor General of India (CAG) audit report chuan Mizorama Green India Mission (GIM) hnuai-ah cheng vaibelchhe 9 leh nuai 19 hman dan rinhlhawm tak a awm a ti.

He mi chungchangah hian CAG chuan Mizoram sorkar chu he thil hi chhui chiang a, a tul anga dan anga hma la turin thurawn a pe a ni. Kar kal ta Ningani-a Assembly dawhkan a Chief Minister-in a dah tak CAG Audit report-ah hian central sorkar ruahmanna GIM hnuai a sum hman dan audit kalpui a nih thu a chuang a. GIM Implementation Guidelines, 2014 ang chuan State Forest Development Agency (SFDA) kut a sum lut Kolasib Forest Development Agency (FDA) hnena hlan chhawn leh chu Village Forest Development Committee (VFDC) kuta pek chhuah leh tur a ni a. SDFDA Bank account a a lan dan chuan kum 2023 March ni 30 khan SDFDA hian cheng vaibelchhe 9 leh nuai 19 hi Kolasib FDA hnenah a pe (transfer) a. Kolasib FDA-in kum 2022-2023 atana Plan of Operation (APO) a ruahmanah chuan cheng vaibelchhe 9 leh nuai 7 chu Kolasib FDA hnuai a VFDC 12-te hnena pek chhuah leh tur a ni a cheng nuai 12 chu pisa inrelbawlana senso (Office Expenses) atan serh hran a ni.

He tiang a nih lai hian Kolasib FDA chuan hemi kum vek April ni 27 khan cheng vaibelchhe 9 leh nuai 7 hi VFDC 12-te account a thun lovin a vaiin cheng vaibelchhe 9 leh nuai 19 hi a pawisa fai-in an la chhuak ta vek a. Hei hi GIM Implementation Guidelines, 2014 kalh tlat a ni. Hei bakah hian Kolasib FDA account endik a ni a, VFDC 12-te hnena cheng vaibelchhe 9 leh nuai 7 pekna leh pisa senso atana cheng nuai 12 hman a nih dan hmuh tur a awm lo. Tangka kum

2022-23 leh kum 2023-24 chhunga VFDC 12 te bank account endikna-ah cheng vaibelchhe 9 leh nuai 7 luhna hmuh a ni lova. VFDC 12 te hnena sum pek ngei a ni tih finfiahna a awm loh avang leh Kolasib FDA in a pawisa fai a cheng vaibelchhe 9 leh nuai 19 a lak chhuah tak hmanna chhui hleih theih a nih tak loh avang hian pawisa hi eiruk a ni thei-in a lang a. Chutih lai chuan Kolasib FDA hian hna thawh a nih dan leh sum hman dan (utilisation certificate) erawh chu an ziaak lang ve thung a ni.

Kum 2025 January khan Environment, Forests & Climate Change department chuan pawisa hi VFDC te hnenah hian pek chhuah ngei a ni tiin auditor-te an chhang a. CAG report chuan department chhanna hi pawm theih a ni lo a ti a. A chhan chu VFDC 12-te hnena Kolasib FDA-in sum a pek chhuahna record leh VFDC te'n an lo dawng ngei tih finfiahna hi a awm lo a ni an ti a. Dil a ni chungin cheng vaibelchhe 9 leh nuai 19 an hmang ngei tih finfiahna voucher hi auditor-te hnenah pek a ni lova. Audit a nih hnu a chhanna-ah hian finfiahna a awm lova, bank lamin an lo chhinchhiah nen a inmil hek lo. Cheng vaibelchhe 9 leh nuai 7 zet VFDC 12-te hnena pe chhuak ni a sawi hi an bank account-ah a lang lova, hemi avang hian eirukna a awm ni a rinhlelhna lian tak a awm a. Department lamin a hmanna tur ang taka hman ral ni a an sawi hi finfiahna a awm lo a ni. Hetiang a nih avang hian Mizoram sorkar chu he thil hi chhui chiang tur leh a mawhphurtu lakah a tul anga hremna lek turin CAG chuan a rawt ta a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



MUHCS

Mizoram Universal Health Care Scheme (MUHCS)-a inziaklut mi nuai 3, sing 2, sang 2 leh 243 an ni.

Assembly fur inkhawm zawh taka Pu Jeje Lalpekhluah zawhna ziaka chhangin Health Minister Pi Lalrinpuui chuan MUHCS 2.0 hnuaia hmang tangkaitu tur chhungkaw inziak lut te chu mipui nawlpui (General category) chhungkaw 48,091, sorkar hnathawk 35,325, pensioner 11,928 leh AB PM-JAY mi nuai 2, sing 2, sang 6 leh 899 an ni a ti a, MUHCS 1.0 (2025-26) chhung khan MUHCS sum hmangin damlo nuai 1, sang 8 leh 518 enkawl an ni a, tuna hman mek MUHCS 2.0 ah hian kumin August ni 24 thleng khan damlo 31,832 enkawl tawh an ni,ati.

MUHCS 1.0 (kum 2025-26 chhung) ah khan cheng vaibelchhe 171 leh nuai 57 pek chhuah a ni a, MUHCS 2.0 ah kumin August ni 24 thleng khan cheng vaibelchhe 99 leh nuai 60 pek chhuah ani tawh bawk. Kum 2025-2026 chhungin MUHCS hnuaiah, phai lama refer damlo 4,772 an awm a. MUHCS hnuaiah hian damdawi-in te sum bat sak chu a awm chiah lo nia sawiin, bill lo lut te bawhzui nghal zel a ni, a ti a, tun dinhmunah bawhzui lai mek damlo bill 1,757 awmin cheng vaibelchhe 18 leh nuai 95 a ni, a ti bawk.



MANN KI BAAT

Prime Minister Narendra Modi-a’n ruihhlo atanga thalaite fihlimna, ram changkang, Nasha-mukt Yuva for Viksit Bharat beihpui thlak mek chu ramchhung hmun hrang hrangah uar taka kalpui chhoh zel a ni, a ti.

Vawiin Akashvani-a Mann Ki Baat hun a hmanna-ah he thu hi sawiin Prime Minister chuan thalaite, ruihhlo atanga an fihlim theihna tur leh ruihhlo awm lohna rama India siam tuma beihpui thlakna chu mi tam tak, a bikin thalai rualin an zawm belh zel a ni, a ti a, tih dan phung pangngai ang ringawta kalpui a ni lo chu a lawmawm tak zet a ni, a ti.

